

MALAQUÍAS

Ityaantaitiri kimityaarini kamantantzinkari Elías
owitsikironi tsika inkinapaaki ikokowitziri

1 ¹Iroka iñaani Pawa ikantakiriri Kamantan-tzinkari Malaquías,
irootaki iyotajiri maaroni Israel-iiti.

3 ¹Ikantzi Pawa Ņaapirori:

Ari nontyaantaki ityaaroni inkaman-takotina,
Iriitaki witsikironi tsika nonkina-paaki.
Omapoka-sityaa inkyii itasorintsi-pankotiki, Piwinkathariti
pamina-mina-tziri.
Ariitzi-mataka pikowajii-tziri, iriitaki nontyaantiri inkinkitha-
takoyi-tairo kasiyakaa-wakaantsi.

4 ¹Iroka iñaani Pawa Ņaapirori, ikantzi:

Okaakitaki kitaitiri iñiitiro siyariri opaamatzi paamari,
Ari intaajyaa kantakaa-pirori aajatzi kaari-pirori, inkimitai-yaaro
opaamatzi tsipanasi.

Ari inthonkyaa intaajyaa, isiyaaro ipomitai-tziro inchato,
Tima inthonkaitiro maaroni ochiwo aajatzi oparitha.

²Irooma awirokaiti pikaratzi pipinkatha-tajiro nowairo,
Ari onkoñaa-tzimo-taimi kamiitha-siri-taantsi osiyaari isiparyii
ooryaatsiri,

Irootaki isiparyaani wawisaako-tajimini osiyawai-tajyaaro iroomi
isiwanki iwaankakiri tsika pisaikaki awiroka.

Antaro pinkimo-siri-yitai, pinkimi-tyaari itharowinta yanini pipira
aririka isitowi kapichikitaiti tsika pasitako-tziri.^a

³Aritaki paatzika-yitairi kaari-piro-siriri,
Pinkimi-takaan-tajiri yaatzika-waitai-tziro samampo-pani,
Aririka omonkara-tapaakyaa kitaitiri nomatan-tajyaarori onkarati
nantayitiri.

Ari ikantzi iñaawaitzi Pawa Ņaapirori.

^a 4.2 pipira = vaca = becerro

- ⁴ Pinkinkithasiri-tairo noñaani,
Nopakiriri pairani nompiratani anta Mamirii-toniki.
Irootaki nosinita-kaantani, irootaki noñaani irasiiti maaroni
Israel-iiti!
- ⁵ Aritaki nontyaanta-kimiri Kamantan-tzinkari Elías,
Tikira omonkara-tapaakya kitaitiri inintziri Pawa, tima kowiinka
onkantajyaa, omapiro-kitajyaa onkaaripiro-paititai.
- ⁶ Aritaki yoipyaa-siri-tairi Pawa ikaratzi iriritaitari, oshiki
imiraawintairi itomi-payi.
Ari ikantajyari itomitaitari, oshiki inkaminthaa-siri-tairi
asitariri-payi.
“Paamaiyaa, nompiyaki-rika, nowasankitairi = kari ikaratzi
saikantarori kipatsi.”